

Mid-Day Dogri News Bulletin, 14th April 2025

समे – 12:25

<><><><><><>

Ambedkar Jayanti

देस अज्ज भारतीय संविधान दे मुख्ख निर्माता डॉ. बी.आर.अम्बेडकर होरें गी हुंदी 134मीं जयंति दे मौके उनेंगी श्रद्धांजलि अर्पित करा करदा ऐ। इस मौके समूलचे देसै च नेके कार्यक्रमें दा सरिस्ता कीता जा करदा ऐ। राष्ट्रपति द्रौपदी मुर्मू, उपराष्ट्रपति जगदीप धनखड़, प्रधानमंत्री नरेन्द्र मोदी, लोकसभा अध्यक्ष ओम बिरला, मंत्री, संसद ते होर दुए मन्ने परम्मने दे लोकें जिंदे च राहुल गांधी बी शामिल हे अज्ज बडलै संसद भवन परिसर च बाबा साहेब हुंदी प्रतिमा पर फुल्ल चाढ़ा करदे न।

<><><><><><>

President- Ambedkar

राष्ट्रपति द्रौपदी मुर्मू होरें डॉ. बी.आर.अम्बेडकर हुंदी जयंति पर लोकें गी शुभकामनां दित्तियां न। राष्ट्रपति होरें अपने सनेए च आखेआ जे अपने प्रेरक जीवन च बाबा साहेब होरें बड़ी मती दिक्कतें—परेशानिएं दा सामना करदे होई बी अपनी इक बक्खरी पंछान बनाई ते अपने बेजोड़ उपलब्धिएं कन्नै दुनिया भर च मान हासल कीता।

<><><><><><>

PM-Ambedkar

प्रधानमंत्री नरेन्द्र मोदी होरें अल्ल बाबा साहेब बी.आर.अम्बेडकर होरें गी उंदी 134 जयंति दे मौके उनेंगी श्रद्धांजलि भेंट कीती। इक ट्वीट च श्री मोदी होरें आखेआ जे बाबा साहेब हुंदी प्रेरणा करियै गै अज्ज देस समाजी न्याह दे सुखने गी सच्च करने च समर्पित भाव कन्नै जुटे दा ऐ। प्रधानमंत्री होरें आखेआ जे डॉ. अम्बेडकर हुंदे सिद्धांत, आदर्श, आत्मनिर्भर ते विकसित भारत दे निर्माण गी बल ते रफ्तार प्रदान करगंन।

<><><><><><>

LG-Ambedkar

उपराज्यपाल मनोज सिन्हा होरें बी डॉ. बी.आर.अम्बेडकर हुंदी जयंति दी पूर्व संध्या पर लोकें गी शुभकामनां दित्तियां न। आकाशवाणी दे जम्मू संवाददाता नै दस्सेआ जे उपराज्यपाल होरें अपने सनेए च अम्बेडकर होरेंगी भारतीय संविधान दा मुख निर्माता दस्सदे होई गलाया जे उनें भारत दे भविष्य गी आकार देने च महत्वै आली भूमिका नभाई ते साढ़े राष्ट्री जीवन ते समाज पर कदे नई मिटने आली छाप छोड़ी। श्री सिन्हा होरें लोकेंअग्गे अपील कीती जे ओह बाबा साहेब हुंदे महान अनमूले गी बनाई रखदे होई इकजुट्ट, बरोबर न्याहपूर्ण ते मानवीय समाज दे निर्माण लेई रलियै कम्म करन।

<><><><><><>

CM-Ambedkar

मुख्यमंत्री उमर अब्दुल्ला होरें भारत रत्न भीम राव अम्बेडकर हुंदी जयंति पर लोकें गी दिली ममारकबाद दित्ती ते भारतीय संविधान दे मुख निर्माता गी श्रद्धांजलि बी दित्ती।

<><><><><><>

PM-Hararyana

प्रधानमंत्री नरेन्द्र मोदी होर अज्ज अम्बेडकर जयंति दे मौके पर हरियाणा दा दौरा लांगन ते हिसार थमां अयोध्या लेई कारोबारी डोआरी गी सैल्ली झंडी दस्सगंन। एहदे कन्नै गै ओह हिसार हवाई अड्डे दी नमीं टर्मिनल इमारत दा नीह पत्थर बी रखगंन। श्री मोदी हुंदा इक जनसभा गी संबोधत करने दा बी कार्यक्रम ऐ। एहदे मगरा प्रधानमंत्री यमुनानगर च विकास परियोजनाएं दा उद्घाटन ते नीह पत्थर रखगंन। गोबर्धन योजना दे नजरियै गी अग्गे बधंदे होई प्रधानमंत्री यमुनानगर दे मुकराबपुर च इक बायोगैस प्लांट दी बी आधारशिला रखगंन।

<><><><><><>

Tawi Arti(byte)

उपराज्यपाल मनोज सिन्हा होरें आखेआ जे मंदरें दे शैहर जम्मू दियां जीवंत परम्परां कुसै गी बी आध्यात्मिक ते आलोकिक आनंद गी मसूसनें दा मौका देने दी छमता रखदियां न ते इत्थें औने आला हर कोई इस आनंद गी मसूस करै एहदे लेई जम्मू दे लोकें गी आपूं इस नंद गी मसूस करदे होई अपनियां परम्पराएं पर मान करना लोड़चदा। उपराज्यपाल होरें एह गल्ल कल संजा बसाखी दे मौके पर जम्मू च तवि रिवर फ्रंट पर आयोजित सूरजे पुत्री तवि आरती

च हिस्सा लेंदे मौके आकखी। इस आरती च खरी मती गिनतरी च लोक शामिल होए। इस दरान चबक्खियां बड़ा गै आलोकिक ते मन परचाई लैने आला म्होल बनी गेदा हा।

<><><><><><>

Machail Mata

कल बसाखी दे मौके पर किश्तवाड़ जिले दी मचेल घाटी च वाका श्री मचेल माता दा मंदर कल्लै थमां श्रद्धालुएं लेई खोली दित्ता गेआ ऐ जेह्दे कन्नै गै इस ब'रे श्रद्धालुएं दा मचेल माता दे दर्शने लेई जाने दा सिलसिला बी शुरू होई गेआ ऐ। इस पवित्र अस्थान दे कपाट खुल्लने दे मौके पाङ्डर नागसेनी थमां विधायक सुनील शर्मा, जम्मू दे डिवीजनल कमीशनर रमेश कुमार ते किश्तवाड़ दे डिप्टी कमीशनर राजेश कुमार शवन ते होर केई लोकें मंदरै च मत्था टेकेआ। इस दरान डिवीजनल कमीशनर होरें 2025 ब'रे दी श्री मचेल माता यात्रा लेई कीती जा'रदिएं तैआरिएं दा व्यापक जायजा लैता।

<><><><><><>

Drone

भारत नै पैहली बारी 30 किलोवाट दे लेजर आधारित थोअर गी इस्तेमाल करियै फिक्स्ड विंग क्राफ्ट मिसाइल ते स्वार्म ड्रोनें गी मारी सुट्टियै अपनी छमता प्रदर्शित कीती ऐ। एह्दे कन्नै भारत उनें चुनें दे मुख्यें अमरीका, चीन ते रूस च शामिल होई गेआ, जिनें एह् छमता पैहले थमां गै प्रदर्शित कीती दी ऐ। हैदराबाद दे ऊर्जा प्रणाली ते सांइसिज दे केन्द्र सीएचईएसएस रक्षा अनुसंधान विकास संगठन डीआरडीओ नै इस प्रणाली दा सफल परीक्षण ऐतवारें गी आंध्रप्रदेश दे करनूल च कीता ऐ।

<><><><><><>